

Ո Ր Ո Շ ՈՒ Մ

Ճանապարհային ոստիկանության վարչական տույժ նշանակելու մասին 13.02.2019թ. թիվ 1909110477 և 1909110565 որոշումներն անփոփոխ, իսկ վարչական բողոքն առանց բավարարման թողնելու մասին

<<13>> 03 2019թ. 17-13 21235-19/17-13 1212

ք.Երևան

Ճանապարհային ոստիկանության պետ, ոստիկանության գնդապետ Ե.Կարապետյանս, վերանայելով Հովհաննես Մխեյանի դիմումի քննարկման արդյունքում ստեղծված նյութերը՝

Պ Ա Ր Զ Ե Ց Ի

Երևան քաղաքի Լուկաշինի 2-րդ փողոցի 23 տան բնակիչ Հովհաննես Մխեյանը դիմումով իր անհամաձայնությունն է հայտնել Ճանապարհային ոստիկանության վարչական տույժ նշանակելու մասին 13.02.2019թ. թիվ 1909110477 և 1909110565 որոշումներին՝ նշելով, որ մառախուղի պատճառով չի նկատել ճանապարհային նշանները և չի իմացել, որ երթևեկում է բնակավայրի տարածքով:

Դիմումի քննարկման արդյունքում պարզվել է, որ դիմումատուի փաստարկը չի կարող վարչական ակտը բեկանելու հիմք հանդիսանալ հետևյալ պատճառաբանությամբ.

<<Չափումների միասնականության ապահովման մասին>> օրենքի պահանջներով պայմանավորված Հայաստանի Հանրապետությունում շահագործվող բոլոր արագաչափ սարքերը սահմանված ժամկետում և կարգով ստուգաչափված են, հետևաբար, սահմանված արագության գերազանցման փաստը դիմումատուին պատկանող տրանսպորտային միջոցով կատարված լինելու հանգամանքը չի կարող կասկածի տակ դրվել, քանի որ լուսանկարում նշված է տրանսպորտային միջոցի երթևեկության գոտին, ուղղությունը և այլն:

Ճանապարհային երթևեկության հսկողության կազմակերպման բաժնի կողմից տրված տեղեկանքների համաձայն՝ 24.01.2019թ. ՀՀ Մ-3 ավտոճանապարհի 65.5 կմ՝ Քուչակ և ՀՀ Մ-3 ավտոճանապարհի 94.1 կմ՝ Գեղարոտ գյուղերի հատվածում տեղադրված արագաչափ սարքերից առաջ և հետո առկա են եղել համապատասխան 5.23.1՝ <<Բնակավայրի սկիզբ>> և 5.24.1՝ <<Բնակավայրի վերջ>> ճանապարհային նշանները:

ՀՀ կառավարության <<Ճանապարհային երթևեկության կանոնները և տրանսպորտային միջոցների շահագործումն արգելող անսարքությունների ու պայմանների ցանկը հաստատելու մասին>> թիվ 955-Ն որոշման 68-րդ կետի համաձայն՝ բնակավայրերում տրանսպորտային միջոցների երթևեկությունը թույլատրվում է 60 կմ/ժ ոչ ավելի արագությամբ:

<<Վարչարարության հիմունքների և վարչական վարույթի մասին>> օրենքի 43-րդ հոդվածի 3-րդ մասի համաձայն՝ վարչական մարմնի կողմից քննարկվող փաստական հանգամանքների վերաբերյալ տվյալներին (տեղեկություններին) վարչական մարմինը կարող է իրազեկ դառնալ բացառապես տվյալ անձի միջոցով, ապա ապացուցման պարտականությունը դրվում է այդ անձի վրա, իսկ դիմումատուն որևէ այլ ապացույցով չի հիմնավորել իրավախախտումների ժամանակ, մառախուղի պատճառով, Արագածոտնի մարզի Քուչակ և Գեղարոտ գյուղերի 5.23.1՝ <<Բնակավայրի սկիզբ>> և 5.24.1՝ <<Բնակավայրի վերջ>> ճանապարհային նշանների անտեսանելի լինելու հանգամանքը: Ավելին իրավախախտումներն ամրագրած լուսանկարներում մառախուղ չի նշմարվում, այլ ընդհակառակը՝ պարզ երևում են բնակելի տներ:

Այսպիսով, ակնհայտ է, որ ՀՀ Մ-3 ավտոճանապարհի 65.5 կմ՝ Քուչակ և ՀՀ Մ-3 ավտոճանապարհի 94.1 կմ՝ Գեղարոտ գյուղերի հատվածում տեղադրված արագաչափ սարքերով արձանագրվել են դիմումատուին պատկանող տրանսպորտային միջոցի փաստացի արագությունները՝ համապատասխանաբար 83 և 82 կմ/ժ, հանելով արագաչափ սարքի հնարավոր սխալանքի 10 կմ/ժ չափը, գերազանցել է երթևեկության սահմանված արագությունը 13 և 12 կմ/ժ-ով, ինչի համար Վարչական իրավախախտումների վերաբերյալ ՀՀ օրենսգրքի 124.4-րդ հոդվածի 2-րդ մասով նախատեսված է վարչական պատասխանատվություն, հետևաբար Ճանապարհային

ոստիկանության վարչական տույժ նշանակելու մասին 13.02.2019թ. թիվ 1909110477 և 1909110565 որոշումներն իրավաչափ են:

Ելնելով վերոգրյալից և ղեկավարվելով Վարչական իրավախախտումների վերաբերյալ ՀՀ օրենսգրքի 293-րդ հոդվածի 1-ին մասի 1-ին կետով՝

Ո Ր Ո Շ Ե Ց Ի

1. Ճանապարհային ոստիկանության վարչական տույժ նշանակելու մասին 13.02.2019թ. թիվ 1909110477 և 1909110565 որոշումները թողնել անփոփոխ, իսկ վարչական բողոքն առանց բավարարման:
2. Սույն որոշումն ուժի մեջ է մտնում հանձնելու օրվան հաջորդող օրը և կարող է բողոքարկվել ՀՀ վարչական դատարան՝ օրենքով սահմանված կարգով և ժամկետներում:
3. Սույն որոշման օրինակն ուղարկել Հովհաննես Մխեյանին:



Կատարող՝ Կ. Սուքիասյան